

全梁文目錄

武帝 卷一至卷七

簡文帝 卷八

元帝

敬帝 已上卷

昭明太子統 卷十九至卷二十一

臨川王宏

臨賀王正德

安成王秀

安成王欣

南平王偉

南平王恪

蕭映

長沙王淵業 一作深業又
一作業避諱

衡陽王元簡

蕭昂 一作景
避諱

蕭昂

蕭昱

邵陵王綸

蕭圓照

蕭方等 已上卷二十一

蕭子範

蕭子顯

蕭子雲 已上卷二十二

蕭子暉

蕭診素

一作
素

蕭介

蕭琛

蕭靡

蕭和

蕭綺 已上卷二十四

沈約 卷二十五至卷三十二

江淹 卷三十三至卷三十九

孫謙

沈麟士

顧憲之

夏侯詳

伏曼容

伏胤

伏挺

樂藹

何點

何胤

何炯

何敬容

曹景宗

劉思効

范述曾 已上卷四十

任昉 卷四十一至卷四十四

謝朓

謝舉

韋叡

范岫

王茂

王瑩

謝幾卿

范縝

范雲

范孝才

范筠

已上卷四十五

陶宏景

卷四十六至卷四十七

王志

王揖

王泰

王緝

王珍國

王暕

王彬

王緘

嚴植之

賀瑒

賀琛

阮研

袁昂

已上卷四十八

何佟之

卷四十九

徐勉

徐憚

徐摛

江革

江貺 已上卷五十

王僧孺 王僧恕

王僧崇 已上卷五十一

陸倕

陸雲公

陸杲

陸煦 已上卷五十二

裴子野 卷五十三

張充

張率

殷芸

殷鈞

高爽

庾曇隆

王中

曹思文 已上卷五十四

鍾岍

鍾嶸 已上卷五十五

劉之遴

丘遲

裴邃

裴之橫 已上卷五十六

劉峻

劉歊 已上卷五十七

周興嗣

司馬筠

柳惲

庾黔婁

許懋

謝廣

陸瑋

明山賓

周捨

司馬褰

已上卷五十八

柳愷

謝綽

庾詠

王琳

王錫

王希尉

張緝

陸璉

沈宏

顏繕

孫挹

劉洽

王仲欣

沈緄

張翻

郭祖深

何憫

何遜

徐緄

王靖

已上卷五十九

吳均

一作筠

劉勰

劉孝綽

已上卷六十一

劉潛

劉孝威

已上卷六十一

陳慶之

陳昕

朱异

到洽

劉昭 已上卷六十二

劉綬

祖暉

朱史

虞履

虞僧虬

虞鱣

陳宣懋

傅岐

王僧辨

元樹

元法僧

已上卷六十三

張纘

張綰

已上卷六十四

王筠

王述

皇侃

已上卷六十五

庾肩吾

阮孝緒

已上卷六十六

任孝恭

謝郁

黃士龍

大士傅弘

王曼穎

沈績

褚游

宗士標

庾元威

一作唐元威

王琛

王鼓

已上卷六十七

後梁宣帝

明帝

後主

甄玄成

沈重

尹德毅

王琳

作韋琳

列女

劉令嫺

已上卷六十八

闕名

奏

議

啟

書

七

銘

已上卷六十九

蒯景厚

王偉

外國

盤盤國王

丹丹國王

于陁利國王

狼牙修國王

婆利國王

中天竺國王

師子國王

已上卷七十

釋氏

釋寶誌

釋僧祐

已上卷七十一
至卷七十二

釋慧皎

卷七十三

釋明徹

釋寶唱

釋法雲

釋智藏

釋僧順

釋僧果

釋智愷

釋曇斐

已上卷七十四

大凡全梁文七十四卷二百四人

全梁文卷一

烏程嚴可均校輯

武帝

帝姓蕭諱衍字叔達小名練南蘭陵武進中都里人齊高帝族孫永明初爲巴陵王南中郎法曹行參軍歷衛將軍王儉東閣祭酒隨王鎮西諮議參軍隆昌初爲寧朔將軍鎮壽春除太子庶子給事黃門侍郎明帝卽位封建陽男歷右軍晉安王司馬進陵太守入爲博士太子中庶子領羽林監鎮石頭尋拜輔國將軍雍州刺史永元末進征東將軍和帝卽位爲尙書左僕射加征東大將軍假黃鉞進中書監大司馬錄尙書驃騎大將軍揚州刺史都督中外諸軍事封梁公加九錫位相國進封梁王以中興二年四月受禪改元七天監普通大通中大通大同中大同太清在位四十八年諡曰武皇帝廟號高祖有周易講疏

三十五卷、尚書大義二十卷、又十一卷、毛詩發題序義一卷、禮記大義十卷、鍾律緯六卷、孝經義疏十八卷、孔子正言二十卷、通史四百八十卷、老子講疏六卷、兵書鈔一卷、兵書要鈔一卷、金策三十卷、圜基品一卷、基法一卷、集三十二卷、詩賦集二十卷、淨業賦三卷、雜文集九卷、別集目錄二卷、

孝思賦 并序

想緣情生、情緣想起、物類相感、故其然也、每讀孝子傳、未嘗不終軸輟書、悲恨拊心、嗚咽年未、髻亂內失、所恃餘喘、吟嬾媪相長、齒過弱冠、外失所怙、限職荆蠻、致闕晨昏、江途遼遠、家無指信、髣髴行路、先君體有不安、晝則輟食、夜則廢寢、方寸煩亂、容身無所、便投刺解職、以遵歸路、于時齊隋郡王子隆鎮撫陝西、頻煩信命、令停一夕、明當早出、江津送別、心慮迫切、不獲承命、止得小船、望星就路、夜冒風浪、不遑寧處、途次定陵、船又損

壞于時門賓周仲連爲鵲頭戍主，借得一劍，奔波兼行，屢經危
險，僅而獲濟。及至戾止，已無逮及。五內層裂，肝心破碎，便欲歸
身山下，畢志墳陵。長兄哀愍，未說獨行。續有北問，狡虜寇邊，朝
廷以先君遺愛，結民咸思在昔，故舊部曲，猶有數千。武慶宗將
領，留防彼鎮。時便有旨，使扞壽春。王事靡盬，辭不獲免。刺史崔
慧景志懷翻覆，遠招逋逃，多聚姦俠。大猾凶醜，莫不雲集。至如
彭益、韓元孫等，不可稱數。倍道電邁，奄至淮淝。凶徒疑駭，相引
離散。臺軍主徐玄慶、房伯玉等，欲襲取慧景，乃因禁之，方得止
息。是歲齊明作相，疑論未決，密馳表疏，勸徵慧景。折簡而召，必
不違拒。卽重遣還，以安其心。姦渠旣出，緣邊無虞。旬朔之間，慧
景反鎮，卽便解甲，以歸京師。因爾驅馳，不獲停息。數鍾百六時，
會雲雷撥亂反正。遂膺四海，念子路見於孔丘。由事二親之
時，常食藜藿之食，爲親負米百里之外。親歿之後，南遊於楚。從

車百乘積粟萬鍾累茵而坐列鼎而食願食藜藿之食爲親負
米不可復得每感斯言雖存若亡父母之恩云何可報慈如河
海孝若消塵今日爲天下主而不及供養譬猶荒年而有七寶
饑不可食寒不可衣永慕長號何解悲思乃於鍾山下建大愛
敬寺於青溪側造大智度寺以表罔極之情達追遠之心不能
遺蓼莪之哀復於宮內起至敬殿竭工匠之巧盡世俗之奇水
石周流芳樹雜沓限以國事亦復不能得朝夕侍食唯有朔望
親奉饋奠雖復薦珍羞而無所瞻似內心崩潰如焚如灼情切
於衷事形於言乃作孝思賦云爾

感四氣之變易見萬物之化成受天和而異命粟地德而齊榮察
蟪蛄於蚊睫觀鷓鴣於北溟彼含識而異見同有色而殊形雖萬
類之眾多獨在人而最靈禮義別於飛走言語異於鸚猩念過隙
之倏忽悲逝川之不停踐霜露而悽愴懷燧穀而涕零掩此哀而

不去亦靡日而弗思、仲由念枯魚而永慕、吾丘感風樹而長悲、雖一志而捨生、奉二親而何期、思因情生、情因思起、導情源以流澍、引思心而無已、既懷憂以終身、亦銜恤而沒齒、當閉居以永念、獨拊膺而自傷、徒升岵而靡瞻、空陟屺其何望、涕縱橫以交流、血沸涌而沾裳、覽地義以自咎、懼滅性之乖方、仰太極以長懷、乃告哀於昊蒼、冀皇天之有感、何報施之茫茫、曉百碎於魏闕、夜萬斷於中腸、心與心而相續、思與思而未央、晨孤立而縈結、夕獨處而徊徨、氣塞哀其似噓、念積心其若狂、至如獻歲發暉、春日載陽、木散百華、草列眾芳、對樂時而無歡、乃觸目而感傷、朱明啟節、白日朝臨、木低甘果、樹接清陰、不娛悅於懷抱、但罔極而纏心、兼葭蒼蒼、白露爲霜、涼氣入衣、淒風動裳、心無迫而自切、情不觸而獨傷、若乃寒冰已結、寒條已折、林飛黃落、山積白雪、旅雁鳴而哀哀、朔風鼓而颼颼、目觸事而破碎、心隨感而斷絕、無一息而緩念、與四時

而長切、年揮忽而莫反、時瞬睽其如電、想慈顏之在昔、哀不可而重見、痛生育之靡荅、顧報復而無片、悲與恨其俱興、涕雜血其如霰、鷗青春而差池、鴻素秋而翱翔、去來候於節物、飛鳴應於陰陽、何在我而不爾、與二氣而乖張、常茹酷而輪迴、歷日夜而不忘、既視丹而成綵、亦見白而爲黃、擾性情以翻覆、沼神慮而迷荒、想鳴鶴而魂斷、聽孤雛而心死、慟終天而無怙、號畢世而靡恃、觀休屠之日殫、豈教義之所及、見甘泉之畫像、每下拜而垂泣、忽心動而不安、遽入侍於帝室、值何羅之作難、乃捨之以投瑟、超王臣之稱首、冠誠勇而無匹、士行己之多方、見石他之有權、身雖死而名揚、乃忠孝而兩全、顧丁蘭其何人、家河內之野玉、時舞象而方及始、成童而親亡、刻木母以供事、常朝夕而在傍、劉真就養而不暇、常遠汲而力寡、苦節感於幽靈、醴泉生於竈下、頌長沙之臨湘、有古初之道始、時父歿而未葬、遇鄰火之卒起、乃伏棺而長號、兩暴至

而火死又何琦其亦然獨樞屋而全止至如王祥黃雀入帳隗通
橫石特起盛彥之開母目邢渠之生父齒覽斯事而眾多亦難得
而具紀靈蛇銜珠以酬德慈烏反哺以報親在蟲鳥其尙爾況三
才之令人治本歸於三大生民窮於五孝置天地而德盈橫四海
而不撓履斯道而不行吁孔門其何教

釋藏策七廣引明集二十九上又略見藝文類聚二

十初學記十七

賦體

草迴風以照春木承雲以含化芳競飛於陽和花爭開於日夜樂
萬類之得所豈此心之云舍欣分竹其厲精慙戎車之屢駕

藝文類聚

五十

淨業賦 并序

少愛山水有懷丘壑身羈俗羅不獲遂志舛獨往之行乖任縱
之心因爾登庸以從王事屬時多故世路屯蹇有事戎旅略無

竄歲上政昏虐下豎姦亂君子道消小人道長御刀應敕梅蟲
兒茹法珍俞靈韻豐勇之如是等多輩誌公所謂亂戴頭者也
誌公者是沙門寶誌形服不定示見無方于時羣小疑其神異
乃羈之華林外閣公亦怒而言曰亂戴頭亂戴頭各執權軸入
出號令威福自由生殺在口忠良被屠馘之害功臣受無辜之
誅服色齊同分頭各驅皆稱帝王人云尊極用其詭詐疑亂眾
心出入盤遊無忘昏曉屏除京邑不脫日夜屬續者絕氣道傷
子不遑哭臨月者行產路側母不及抱百姓慄慄如崩厥角長
沙宣武王有大功於國禮報無報酷害奄及至於弟姪亦罹其
禍遂復遣桓神與杜伯符等六七輕使以至雍州就諸軍帥欲
見謀害眾心不與故事無成後遣劉山陽灼然見取壯士貔虎
器甲精銳君親無校便欲束身待戮此之橫暴出自羣小畏歷
溺三不弔況復姦豎平若默然就死爲天下笑俄而山陽至荆

州爲蕭穎胄所執卽遣馬驛傳道至雍州乃赫然大號建牙豎
旗四方同心如響應聲以齊永元二年正月發自襄陽義勇如
雲舳艫翳漢竟陵太守曹宗馬軍主殷昌等各領騎步夾岸迎
候波浪逆流亦四十里至朕所乘舫乃止有雙白魚跳入舫前
義等孟津事符冥應雲動天行雷震風馳郢城剋定江州降款
姑熟甲冑望風退散新亭李居士稽首歸降獨夫旣除蒼生甦
息便欲歸志園林任情草澤下逼民心上畏天命事不獲已遂
膺大寶如臨深淵如履薄冰猶欲避位以俟能者若其遜讓必
復魚潰非直身死名辱亦負累幽顯乃作賦曰日夜常思惟循
環亦已窮終之或得離離之必不終負辰臨朝冕旒四海昧旦
乾乾夕惕若厲朽索御六馬方此非譬世論者以朕方之湯武
然朕不得以比湯武湯武亦不得以比朕湯武是聖人朕是凡
人此不得以比湯武但湯武君臣義未絕而有南巢白旗之事

朕君臣義已絕，然後埽定獨夫，爲天下除患，以是二途，故不得相比。朕布衣之時，唯知禮義，不知信向，烹宰眾生，以接賓客，隨物肉食，不識菜味。及至南面，富有天下，遠方珍羞，貢獻相繼，海內異食，莫不畢至。方丈滿前，百味盈俎，乃方食輟筋，對案流泣，恨不得以及溫清，朝夕供養，何心獨甘此膳？因爾蔬食，不噉魚肉，雖自內行，不使外知。至於禮宴，羣臣饋膳，案常菜食，味習體過黃羸。朝中班班，始有知者。謝朓、孔彥、類等，屢勸解素，乃是忠至。未達朕心，朕又自念有天下，本非宿志，杜恕有云：「剗心擲地，數片肉耳。」所賴明達君子，亮其本心。誰知我不貪天下，唯當行人所不能行者。令天下有以知我心，復斷房室，不與嬪侍同屋而處，四十餘年矣。於時四體小惡，問上省師劉澄之。姚菩提疾候，所以剗澄之云：「澄之知是飲食過所致，答劉澄之云：「我是布衣，甘肥恣口。」劉澄之云：「官昔日食，那得及今日食。」姚菩提含笑。

搖頭云唯菩提知官房室過多所以致礙於時久不食魚肉亦斷房室以其智非和緩術無扁華默然不言不復詰問猶令爲治劉澄之處酒姚菩提處九服之病逾增甚以其無所知故不復服因爾有疾常自爲方不服醫藥亦四十餘年矣本非精進既不食眾生無復殺害障既不御肉無復欲惡障除此二障意識稍明內外經書讀便解悟從是已來始知歸向禮云人生而靜天之性也感物而動性之欲也有動則心垢有靜則心淨外動既止內心亦明始自覺悟患累無所由生也乃作淨業賦云爾

觀人生之天性抱妙氣而清靜感外物以動欲心攀緣而成膏過恆發於外塵累必由於前境若空谷之應聲似遊形之有影懷貪心而不厭縱內意而自騁目隨色而變易眼逐貌而轉移觀五色之玄黃玩七寶之陸離著華麗之窈窕耽治容之透迤在寢興而

不捨亦日夜而忘疲。如英煤之在摘，若駿馬之帶羈。類白日之麗天，乃歷年之不虧。觀耳識之愛聲，亦如飛鳥之歸林。旣流連於絲竹，亦繁會於五音。經昏明而不絕，歷四時而相尋。或亂情而惑慮，或惱耳而墮心。至如香氣醇起，觸鼻發識。婉婉追隨，氤氳無極。蘭麝夾飛，如鳥二翼。若渴飲毒，如寒披棘。舌之嗜味，眾塵無有大苦。鹹酸莫不甘口，噉食眾生。虐及飛走，唯日不足。長夜飲酒，悖亂明行。罔慮幽咎，身之受觸。以自安怡，美目清揚。巧笑蛾眉，細腰纖手。弱骨豐肌，附身芳潔。觸體如脂，狂心迷惑。倒想自欺，至如意識。攀緣亂念，無邊靡懷。善想皆起，惡筌如是。六塵同障，善道方紫。奪朱如風靡草，抱惑而生。與之偕老，隨逐無明。莫非煩惱，輪迴火宅。沈溺苦海，長夜執固。終不能改，速否相隨。災異互起，內懷邪信。外縱淫祀，掛虛枉命。躡寶橫死，妄生神祐。以招福祉，前輪折軸。後車覆軌，殃國禍家。亡身絕祀，初不內訟。責躬反己，皇天無親。唯與善人。

外清眼境內淨心塵不與不取不愛不嗔如玉有潤如竹有筠如芙蓉之在池若芳蘭之生春淤泥不能汙其體重昏不能覆其真霧露集而珠流光風動而生芬爲善多而歲積明行動而日新常與德而相隨恆與道而爲鄰見淨業之愛果以不殺而爲因離欲惡而自修故無障於精神患累已除障礙亦淨如久澄水如新磨鏡外照多像內見眾病既除客塵又還自性三途長乖八難永滅止善旣修行善無缺清淨一道無有異轍唯有哲人乃能披襟如石投水莫逆於心心清冷其若冰志皎潔其如雪在欲結其旣除懷憂畏其亦滅與恩愛而長遠顧生死而永別覽當今之逸少想後來之英童懷荆玉而未剖藏神器而存躬修聖行其不已信善積而無窮永劫揚其美名萬代流於清風豈伏強而稱勇乃道勝而爲雄

釋藏策七廣宏明集二十九上

園基賦

圍險象天方局法地枰則廣羊文犀子則白瑤玄玉方目無斜直
道不曲爾乃建將軍布將士列兩陣驅雙軌徘徊鶴翔差池燕起
用忿兵而不顧亦憑河而必危癡無戒術而好鬪非智者之所爲
運疑心而猶豫志無成而必虧今一碁之出手思九事而爲防敵
謀斷而計屈欲侵地而無方不失信而致寇不助彼而爲強不讓
他以增地不失子而云亡落重圍而計窮欲佻巧而行促劇疏勤
之迫遭甚白登之困辱或龍化而超絕或神變而獨悟勿膠柱以
調瑟專守株而待兔或有少碁已有活形失不爲悴得不爲榮若
其苦戰未必能平用折雄威致損令名故城有所不攻地有所不
爭東西馳走左右周章善有翻覆多致敗亡雖奮銳以將取必居
謙以自牧譬猛獸之將擊亦俛目而固伏若局勢已勝不宜過輕
禍起於所忽功墜於垂成至如玉壺銀臺車廂井欄旣見知於曩
日亦在今之可觀或非劫非持兩懸兩生局有眾妙多不可名或

方四聚五、花六、持七、雖涉戲之近事，亦臨局而應悉，或取結角，或營邊鄙，或先點而亡，或先撇而死，故君子以之遊神，先達以之安思，盡有戲之要道，窮情理之奧祕。藝文類聚

制旨解釋天象

金剛山自近天之南，黑山則近天之北極，準於金剛為偏，而於南北為一心，令上林館學士虞履及上林館倪徽、仁劉、又道等具其度數，開列於後。開元占經

明堂制

明堂准大戴禮，九室八牖三十六戶，以茅蓋屋，上圓下方，鄭玄據援神契亦云，上圓下方，又云八窗四達，明堂之義本是祭五帝神，九室之數未見其理，若五堂而言，雖當五帝之數，向南則背叶光紀，向北則背赤燠，怒東向西向，又亦如此，於事殊未可安，且明堂之祭五帝，則是總義，在郊之祭五帝，則是別義，宗祀所配，復應有

室若專配一室則是義非配五若皆配五位以理而言明堂本無有室

若如鄭玄之義聽朔必在明堂於此則人神混淆莊敬之道有廢春秋云介居二大國之間此言明堂左右个者謂所祀五帝堂之南又有小室亦號明堂分爲三處聽朔既三處則有左右之義在營域之內明堂之外則有个名故曰明堂左右个也以此而言聽朔之處自在五帝堂之外人神有別差無相干

隋書禮儀志一

郊廟不宮懸制

先儒皆以宗廟宜設宮懸案周官奏黃鍾歌大呂舞雲門以祀天神奏太簇歌應鍾舞咸池以祭地祇奏夷則歌小呂舞大濩以饗先妣奏無射歌夾鍾舞大武以享先祖虞書云夏擊鳴球搏拊琴瑟以詠祖考來格下管鞀鼓合止祝敔笙鏞以間周禮則分樂享祀虞書則止鳴四懸求之於古無宮懸之文案所以不宮懸者事

人禮辨事神禮節禮器云天子之堂九尺而至敬不壇天子龍衮而
而至敬不文觀天下物無可曰稱其德者則以少爲貴郊犧牲云
宗廟之器可用也而不可使其利所以交於神也不可以同於所
安樂之義也王肅初不分析此前數旨直言用天子之制若郊廟
既均其制二神禮文復何以同今宜祀天地宗廟遂所應須便卽
設之則非宮非軒非判非特直以致敬所應施用耳通典一百四十七
宗廟用迎送樂制

禮云祭之日樂與哀半樂以迎來哀以送往尙書有高宗彤日之
文詩著絲衣繹賓尸之作故儒者說言今日之祭明日又祭殷曰
彤周以爲繹彤繹之祭在乎門儀名以爲祊此豈不以神靈不測
於此庶或遇之殷人求陽周人求陰今已絕灌禘之禮宜在求陽
之義尸非神神非尸今可得言主非神神非主以不若爾主雖安
於龕室神則無所不之送迎之樂彌會陰陽不測之理前儒之議

如似可安今隨人所用通典一百四十七

安成始興二王爲慈母服制天監七年

二王在遠諸子宜攝祭事梁書司馬筠傳

議皇子爲慈母服制天監七年

禮言慈母凡有三條一則妾子之無母使妾之無子者養之命爲母子服以三年喪服齊衰章所言慈母是也二則嫡妻之子無母使妾養之慈撫隆至雖均乎慈愛但嫡妻之子妾無爲母之義而恩深事重故服以小功喪服小功章所以不直言慈母而云庶母慈己者明異於三年之慈母也其三則子非無母正是擇賤者視之義同師保而不無慈愛故亦有慈母之名師保既無其服則此慈亦無服矣內則云擇於諸母與可者使爲子師其次爲慈母其次爲保母此其明文此言擇諸母是擇人而爲此三母非謂擇取兄弟之母也何以知之若是兄弟之母其先有子者則是長妾長

妾之禮實有殊加何容次妾生子乃退成保母斯不可也又有多
兄弟之人於義或可若始生之子便應三母俱闕邪由是推之內
則所言諸母是謂三母非兄弟之母明矣子游所問自是師保之
慈非三年小功之慈也故夫子得有此對豈非師保之慈母無服
之證乎鄭玄不辯三慈混爲訓釋引彼無服以注慈已後人致謬
實此之由經言君子子者此雖起於大夫明大夫猶爾自斯以上
彌應不異故傳云君子子者貴人之子也總言曰貴則無所不包
經傳互文交相顯發則知慈加之義通乎大夫以上矣宋代此科
不乖禮意便加除削良是所疑

梁書司馬筠傳又南史司馬筠傳

唱斷肉經竟制

諸僧道諸小僧輩看經未徧互言無斷肉語今日此經言何所道
所以唱此革履文者本意乃不在此正爲此三十三日法雲法師
講涅槃斷肉事於時僧正慧超法寵法師難云若經文究竟斷一

切肉乃至自死不得食者此則同尼乾斷皮革不得著革屣若開
皮革得著革屣者亦應開食肉法雲法師乃已有通釋而二法師
難意未了於時自仍通云若是聖人故自不著此物若中行人亦
不著此著此皆是下行人所以不同尼乾者語有所舍若無麻紮
之鄉亦有開皮革義論有麻紮處大慈者乃實應不著但此事與
食肉不得頓同凡著一革屣經久不壞若食噉眾生就一食中便
害無量身命況日日餐咀數若恆沙亦不可得用革屣以並斷肉
於時諸僧乃無復往復恐諸小僧執以爲疑方成巨弊所以唱此
不受革屣文正欲釋一日所疑非關前制凡噉肉者是大罪障經
文道昔與眾生經爲父母親屬眾僧那不思此猶忍食噉眾生已
不能投身饑虎割肉貿鷹云何反更噉他身分諸僧及領徒眾法
師諸尼及領徒眾者各還本寺宣告諸小僧尼令知此意

廣宏明
集二十

賜進士出身二品銜廣東等處提刑按察使司按察使兼管驛傳事務黃岡王毓藻校刊

全梁文卷一終

全梁文卷二

烏程嚴可均校輯

武帝二

降省齊世王侯封爵詔

天監元年四月丙寅

與運升降前代舊章齊世王侯封爵悉皆降省其有效著艱難者

別有後命惟宋汝陰王不在除例

梁書武帝紀中

降封豫章王元琳詔

襲隆往代義炳彝則朕當此樂推思引前典豫章王元琳故巴陵

王昭秀胄子同齊氏宗國高武嫡胤宜祚并邑以傳世祀降新淦

縣侯五百戶

南齊書豫章王昱傳

降封王儉為南昌侯詔

初受禪

庭堅世祀靡輟於宗周樂毅錫壤乃昭於洪漢齊故太尉南昌公
含章履道草昧興齊謨明翊贊同符在昔雖子房之尉為帝師文

若之隆比王佐無以尚也朕膺麻受圖惟新寶命莘莘玉帛升降

有典永言前代敬惟徽烈匪直懋勳善兼懷樹可降封南昌縣公

為侯食邑千戶

梁書太宗
王皇后傳

追贈張弘籍詔

亡舅齊鎮西參軍素風雅猷夙肩名輩降年不永早世潛輝朕少

離苦辛情地彌切雖宅相克成輅車靡贈與言永往觸目慟心可

追贈廷尉卿

梁書太祖
張皇后傳

放還罪口詔

四月丙寅

大運肇升嘉慶惟始劫賊餘口沒在臺府者悉可蠲放諸流徙之

家並聽還本

梁書武
帝紀中

放遣宮女詔

四月丁卯

宋氏以來並恣淫侈傾宮之富遂盈數千推算五都愁窮四海並

嬰罹冤橫拘逼不一撫絃命管良家不被蠲織室繡房幽尼猶見

役弊國傷和莫斯爲甚凡後宮樂府西解暴室諸如此例一皆放
遣若衰老不能自存官給廩食

梁書武帝紀中

分遣內侍省方詔

四月庚午

觀風省俗哲后弘規符岳巡方明王盛軌所以重華在上五品聿
修文命肇基四載斯履故能物色幽微耳目日屠鈞致王業於緝熙
被清風於遐邇朕以寡薄昧於治方藉代終之運當符命之重取
監前古懷若馭朽思所以振民育德去殺勝殘解網更張置之仁
壽而明慙照遠智不周物兼以歲之不易未遑卜征興言夕惕無
忘鑒寐可分遣內侍周省四方觀政聽謠訪賢舉滯其有田野不
闢獄訟無章忘公徇私侵漁是務者悉隨事以聞若懷寶迷邦蘊
奇待價蓄響藏真不求聞達並依名騰奏罔或遺隱使輜軒所屈

如朕親覽焉

梁書武帝紀中

定贖刑條格詔

四月庚午

金作贖刑有聞自昔入縲以免施於中代民悅法行莫尚乎此永
言叔世偷薄成風嬰讐入罪厥塗匪一斷弊之書日纏於聽覽鉗
鈇之刑歲積於牢狴死者不可復生生者無因自返由此而望滋
實庸可致乎朕夕惕思治念崇政術斟酌前王擇其令典有可以
憲章邦國罔不由之庶愧心於四海昭情素於萬物俗偽日久禁
網彌繁漢文四百邈焉已遠雖省事清心無忘日用而委銜廢策
事未獲從可依周漢舊典有罪入贖外詳爲條格以時奏聞

梁書武帝

紀中又略見南史六

置誦木肺石函詔

四月癸酉

商俗甫移遺風尙熾下不上達由來遠矣并中馭索增其懷然可
於公車府誦木肺石倂各置一函若肉食莫言山阿欲有橫議投
誦木函若從我江漢功在可策犀兕徒弊龍蛇方縣次身才高妙
擯壓莫通懷傳呂之術抱屈賈之歎其理有皦然受困包圍夫大

例今賜卿鹿皮巾等後數日望能入也

梁書何點傳

加范述曾禮秩詔

初踐阼

中散大夫范述曾昔在齊世忠直奉主往莅永嘉治身廉約宜加

禮秩以厲清操可太中大夫賜絹二十匹

梁書范述曾傳

下詔徵何點

前徵士何點高尚其道志安容膝脫落形骸棲志管具朕日吳思

治尚想前哲况親得同時而不與為政喉唇任切必俟邦良誠望

惠然屈居獻替可徵為侍中

梁書何點傳 案何點傳此下有復詔資給何點藝文類聚以為沈約作

不釋保誌詔

誌公迹拘塵垢神遊冥寂水火不能焦濡蛇虎不能侵懼語其佛

理則聲聞以上談其隱淪則遁仙高者豈得以俗士常情空相拘

制何其鄙狹一至於此自今行來隨意出入勿得復禁

高僧傳十

許風聞奏事詔

閏月壬寅

成務弘風，肅厲內外，實由設官分職，互相懲糾，而頃壹拘常式，見失方奏，多容違情，莫肯執咎，憲綱日弛，漸以為俗。今端右可以風聞奏事，依元熙舊制。梁書武帝紀中

許曹郎奏事詔

自禮闈陵替，歷茲永久，郎署備員，無取職事，糠粃文案，貴尚虛閒，空有趨墀之名，了無握蘭之實。曹郎可依昔奏事。隋書

贈諡張弘策詔 五月

亡從舅衛尉，慮發所忽，殞身祇豎，其情理清真，器識淹濟，自藩升朝，契闊夷阻，加外氏凋衰，饗當屢絕，與感渭陽，情寄斯在，方賴忠勳，翼宣寡薄，報效無徵，永言增慟，可贈散騎常侍、車騎將軍，給鼓

吹一部，諡曰愨。

梁書張弘策傳

詔任昉

聊為七夕詩五韻，殊未近詠歌，卿雖訥於言而辯於才，可即制付

使者文選任彦昇奏答教示

定梁律詔七月詩啟注引在助集
八月丁未

律合不一、實難去弊、殺傷有法、昏墨有刑、此蓋常科、易為條例、至如三男一妻、懸首造獄、事非慮內、法出恆鈞、前王之律、後主之令、因循創附、良各有以、若遊辭費句、無取於實錄者、宜悉除之、求文指歸、可適變者、載一家為本、用眾家以附、景丁俱有、則去丁以存景、若景下二事、注釋不同、則二家兼載、咸使百司、議其可不、取其可安、以為標例、宜云某等如干人同議、以此為長、則定以為梁律、畱尚書比部、悉使備文、若班下州部、止撮機要、可無二門、侮法之弊、隋書刑法志 案梁書武帝紀中云 詔中書監王瑩等八人參定律令

訪百寮古樂詔元年
夫聲音之道、與政通矣、所以移風易俗、明貴辨賤、而韶濩之稱、空傳、咸英之實、靡託、魏晉以來、陵替滋甚、遂使雅鄭混淆、鍾石斯謬、

天人缺九變之節朝醮失四懸之儀歷年永久將墮於地

二句從初學記

補朕昧且坐朝思求厥旨而舊事匪存未獲釐正寤寐有懷所為

歎息卿等學術通明可陳其所見

隋書音樂志上武帝思弘古樂天監元年遂下詔訪百寮又見

初學記

十五

荅何佟之等請修五禮詔

元年

禮壞樂缺故國異家殊實宜以時修定以為永準但頃之修撰以

情取人不以學進其掌知者以貴總一不以稽古所以歷年不就

有名無實此既經國所先外可議其人入定即便撰次

梁書徐勉傳

敕諸州月一訊獄詔 二年正月甲寅

三訊五聽著自聖典哀矜折獄義重前誥蓋所以明慎用刑深戒

疑枉成功致治罔不由茲朕自藩部常躬訊錄求理得情洪細必

盡末運弛綱斯政又闕牢狃沈壅申訴靡從朕屬當期運君臨億

兆雖復齋居宣室留心聽斷而九牧遐荒無因臨覽深懼懷冤就

鞠匪唯一方可申救諸州月一臨訊博詢擇善務在確實梁書武帝紀中

贈范雲詔五月

追遠興悼常情所篤況問望斯在事深朝寄者乎故散騎常侍尚書右僕射香城侯雲器範貞正思懷經遠爰初立志素履有聞脫巾來仕清績仍著燮務登朝且瞻惟允綢繆竊贊義簡朕心雖勤非負勒而舊同論講方騁遠塗永毗庶政奄致喪殞傷悼於懷官加命秩式備徽典可追贈侍中衛將軍僕射侯如故并給鼓吹一

部梁書范雲傳

下扶南王詔七月

扶南王僑陳如闔耶跋摩介居海表世纂南服厥誠遠著重譯獻賧宜蒙酬納班以榮號可安南將軍扶南王梁書海南諸國傳

答袁昂詔二年

朕遺射鈎卿無自外梁書袁昂傳

遣使巡行詔三年六月丙子

昔哲王之宰世也每歲卜征躬事巡省民俗政刑罔不必逮未代風凋久曠茲典雖欲肆遠忘勞究臨幽仄而居今行古事未易從所以日晏踟躕情同再撫總九州遠近民庶或川路幽遐或貧羸老疾懷冤抱理莫由自申所以東海匹婦致災邦國西土孤魂登樓請訴念此於懷中夜太息可分將命巡行州部其有深冤鉅害抑鬱無歸聽詣使者依源自列庶以矜隱之念昭被四方邊聽

遠聞事均親覽

梁書武帝紀中

贈蔡道恭詔八月

持節都督司州諸軍事平北將軍司州刺史漢壽縣開國伯道恭器幹詳審才志通烈王業肇構致力陝西受任邊垂效彰所莅寇賊憑陵竭誠守禦奇謀開出捷書日至不幸抱疾奄至殞喪遺略所固得移氣朔自非徇國忘己忠果並至何能身沒守存窮而後

屈言念傷悼特兼常懷追榮加等抑有恆數可贈鎮西將軍使持節都督刺史伯如故并尋購喪櫬隨宜資給梁書蕭道恭傳

除贖罪科詔

十一月甲子

設教因時消薄異政刑以世革輕重殊風昔商俗未移民散久矣嬰網陷罟日夜相尋若悉加正法則赭衣塞路並申弘宥則難用爲國故使有罪入贖以全元元之命今遐邇知禁園狎稍虛率斯以往庶幾刑措金作權典宜在蠲息可除贖罪之科梁書武帝紀中

給贖何點詔

三年

新除侍中何點棲遲衡泌白首不渝奄至殞喪倍懷傷惻可給第一品材一具贖錢二萬布五十匹喪事所須內監經理梁書何點傳

選侍郎詔

三年

尙書郎在職清能或人才高妙者爲侍郎梁書到沆傳

齋日去廟二百步斷哭詔

三年

六門之內士庶甚多四時蒸嘗俱斷其哭若有死者棺器須來既許其大而不許其細也到齋日宜去廟二百步斷哭隋書禮儀志

到齋日六門

斷哭詔云云

定選格詔四年正月癸卯

今九流常選年未三十不通一經不得解褐若有才同甘顏勿限

年次

梁書武帝紀中又見南史六

停止宮人觀禮詔正月戊申

夫禮郊饗帝至敬攸在致誠盡懇猶懼有違而往代多令宮人縱

觀茲禮幃宮廣設輜軒耀路非所以仰虔蒼昊昭感上靈屬車之

聞見譏前世便可自今停止梁書武帝紀中

置五經博士詔四年

二漢登賢莫非經術服膺雅道名立行成魏晉浮蕩儒教淪歇風

節罔樹抑此之由朕日昃罷朝思聞俊異收士得人實惟醇獎可

置五經博士各一人廣開館宇招內後進

梁書儒林傳序

北伐詔 十月丙午

門下周文薄伐實靈邊患漢武命師允恢王略叢爾犬羊陵縉日
久宋氏云衰乘釁逞暴海岱彭鄒剪焉淪覆雖每存拯定雄圖弗
舉齊末糾紛復肆姦毒宛葉淮肥仍離內侮偽曾惡稔天誅自降
凶渠嗣虐險匿彌流殘鉏親黨阻噬黔庶繁役絲興毒賦雲起司
冀餘華中州舊族綴足宛頸載離塗炭延首南雲思沾王澤鼎運
啟基大業草創蠢彼戎心仍窺疆場虔劉我口郡侵擾我徐方小
豎道遷乘隙背誕凶醜貪愚復相苞納前以叛臣難長彼此齊患
推心忖物庶必聞同故有移書較陳往旨而方加擁蔽曾無反報
同惡相濟市賈非匹告舍既遠難以義獎非威非力制勝莫從加
以醜數云亡幽顯咸應訛謠表徵災沴備兆殄滅之期皎如日月
左伊右瀍質殷霜露鳴泉是宅非謂天道一星已周實為冥數取

亂之機事協茲日頃時和歲稔政平人豫華戎內款表疏相屬便
宜廣命羣帥赫然大舉總一車書混同禹迹具位泉猷等戎卒七
萬先定壽春某等武旅五萬揚旌灤岷旣清潁汝口臨瀍澗某等
鐵騎二萬超影絕羣出自大徐傍趨鞏洛某等組甲四萬霜鋒曜
日發自淮汭直指金墉某等率羽林趨勇五萬某等率二兗剽猛
熊羆十萬同濟彭泗經汴入河某等海舶萬舳徑掩臨淄某等輕
銳五萬風偃齊岱拂茲鉅野汎彼孟津某等勒司郢之師曉果六
萬步出義陽橫轡熊耳某等率三州武毅劍客八萬人自曾陽傳
檄峭陘暨中嶽而解鞍指浮橋而一息並救某等連旌五萬水陸
齊邁具位泉藻帥徒七萬雲飛靈關北通接路澄廓隴右凡此將
帥啟塗載路魚麗後軍駱驛繼軌經啟中原括囊九服伐罪弔人
於是乎在大眾外臨宜有總一自非密親英譽風略兼遠無以專
任閩外授律羣師臨川王宏可權進督南北兗徐青冀豫司霍人

州都督北討諸軍事命將出車咸有副貳具位恢當作可暫輟端
右參贊戎機舟徒雷駭熊武百萬投石拔距之力招關扛鼎之威
岳動川移風馳電邁鐵馬方原戈船千里百道并驅同會洛邑戡
翦逋醜滅掃鯨鯨被仁風於兩周撫遺黎於趙魏將令溥天之下
於斯大同偃伯靈臺何遠之有元恪若能率其徒屬與機軍門者
中軍府以時將送當待以列侯之禮文館詞林
均選詔 五年正月丁卯

在昔周漢取土方國頃代凋訛幽仄罕被人孤地絕用隔聽覽士
操淪胥因茲靡勸豈其岳瀆縱靈偏有厚薄實由知與不知用與
不用耳朕以菲德君此兆民而兼明廣照屈於堂戶飛耳長目不
及四方永言愧懷無忘旦夕凡諸郡國舊族邦內無在朝位者選
官搜括使郡有一人梁書武帝紀中

遣官錄囚詔 四月甲寅

朕昧且齊居惟刑是恤三辟五聽寢與載懷故陳肺石於都封增
官司於詔獄殷勤親覽小大以情而明慎未洽囹圄尙擁永言納
隍在予與愧凡犴獄之所可遣法官近侍遞錄囚徒如有枉滯以

時奏聞

梁書武
帝紀中

祝史罪已詔

六年正月己卯

夫有天下者義非爲己凶荒疾癘兵革水火有一於此責歸元首
今祝史請禱繼諸不善以朕身當之永使災害不及萬姓俾茲下
民稍蒙寧息不得爲朕祈福以增其過特班遠邇咸令遵奉

梁書
武帝

紀

革選詔

六年

在昔晉初仰惟盛化常侍侍中並奏帷幄員外常侍特爲清顯陸
始名公之胤位居納言曲蒙優禮方有斯授可分門下二局委散
騎常侍尙書案奏分曹入集書通直常侍本爲顯爵員外之選宜

參舊準人數依正員格隋書百官志上

元會應南面詔六年

頃代以來元日朝畢次會羣臣則移就西壁下東向坐求之古義

王者讌萬國唯應南面何更居東面隋書禮儀志四

議元會受誓詔六年

元日受五等誓珪璧並量所付隋書禮儀志四

立學詔七年正月乙酉

建國君民立教為首不學將落嘉植靡由儒林傳序作砥身朕肇

基明命光宅區宇雖耕耘雅業傍闡藝文而成器未廣志本猶闕

非所以鎔範貴遊納諸軌度思欲式敦讓齒自家刑國今聲訓所

漸戎夏同風宜大啟庠敦博延胄子務彼十倫弘此三德使陶鈞

遠被微言載表梁書武帝紀中又見儒林傳

營建象闕詔正月戊戌

昔晉氏青蓋南移日不暇給而兩觀莫築懸法無所今禮盛化光

役務簡便可營建象闕以表舊章

文選石闕銘注引劉璠梁典

將有事太廟詔七年

禮云齋日不樂今親奉始出宮振作鼓吹外可詳議隋書音樂志上通典一百

四十

下高驪王高雲詔二月乙亥

高驪王樂浪郡公雲乃誠款著貢驛相尋宜隆秩命式弘朝典可

撫東大將軍開府儀同三司持節常侍都督王並如故梁書東夷高句驪傳

開山澤常禁詔九月丁亥

芻牧必往姬文垂則雉兔有刑姜宣致貶藪澤山林毓材是出斧

斤之用比屋所資而頃世相承並加封固豈所謂與民同利惠茲

黔首凡公家諸屯戍見封燠者可悉開常禁梁書武帝紀中

詔詳定郊祀遠服七年

禮王者祀昊天上帝則大裘而冕祀五帝亦如之又云莞席之安而蒲越橐秸之用斯皆至敬無文貴誠重質今郊用陶匏與古不異而大裘蒲秸獨不復存其於質敬恐有未盡且一獻爲質其劔佩之飾及公卿所著冕服可共詳定

隋書禮儀志一

贈諡鄭紹叔詔

七年

追往念功前王所篤在誠惟舊異代同規通直散騎常侍右衛將軍東興縣開國侯紹叔立身清正奉上忠恪契關藩朝情績顯著爰及義始實立茂勳作牧疆境效彰所莅方申任寄協贊心膂奄至殞喪傷痛於懷宜加優典隆茲寵命可贈散騎常侍護軍將軍給鼓吹一部東園祕器朝服一具衣一襲凶事所須隨由資給諡曰忠

梁書鄭紹叔傳

置陵令詔

七年

陵監之名不出前詔且宗廟憲章既備典禮園寢職司禮不容易

諸王陵先立監者改為令。唐書官品志

敘錄寒儒詔 八年五月壬午

學以從政殷勤往哲祿在其中抑亦前事朕思闡治綱每敦儒術
軾閣關館造次以之故負裘成風甲科開出方當置諸周行飾以
青紫其有能通一經始末無倦者策實之後選官可量加敘錄雖
復牛監羊肆寒品後門並隨才試吏勿有遺隔。梁書武帝紀中

報阮研言王敬胤遺命詔 八年

敬胤令其息崇素氣絕便沐浴藉以二簾蔽斃地周身歸葬慮侯
此達生之格言賢夫玉匣石椁遠矣然子於父命亦有所從有所
不從今崇素若信遺意土周淺薄屬辟不施一朝見侵狐鼠戮屍
已甚父可以訓子子亦不可行之外內易棺此自奉親之情藉土
而葬亦通人之意宜兩捨兩取以達父子之志棺周於身土周於
椁去其牲奠敘以時服一可以申情二可以稱家禮教無違生死

無辱此故當為安也

南史四十九劉歊傳

今皇太子王侯之子入學詔

九年三月乙未

王子從學著自禮經貴遊咸在實惟前詔所以式廣義方克隆教

道今成均大啟元良齒讓自斯以降並宜隸業皇太子及王侯之

子年在從師者可令入學

梁書武帝紀中

下林邑王范天凱詔

四月

林邑王范天凱介在海表乃心款至遠修職貢良有可嘉宜班爵

號被以榮澤可持節督緣海諸軍事威南將軍林邑王

梁書海南諸國傳

使內外官各陳損益詔

五月己亥

朕達聽思治無忘日昃而百司羣務其途不一隨時適用各有攸

宜若非總會眾言無以備茲親覽自今臺閣省府州郡鎮戍應有

職僚之所時共集議各陳損益具以奏聞

梁書武帝紀中

妙簡都令史詔

九年

尚書五都職參政要非但總領眾局亦乃方軌二丞頃雖求才未
臻妙簡可革用士流每盡時彥庶同持領秉此羣目

隋書百官志上

賜進士出身二品銜廣東等處提刑按察使司按察使兼管驛傳事務西岡王毓藻校刊

全梁文卷二終

全梁文卷三

烏程嚴可均校輯

武帝三

罷鳳皇銜書詔

朕君臨南面道風蒸鬪嘉祥時至為媿已多假令巢倅軒閣集同
昌戶猶當顧循寡德推而不居況於名實頓爽自欺耳目一日元
會太樂奏鳳皇銜書伎至乃舍人受書升殿跪奏誠復興平前代
率由自遠內省懷慙彌與事篤可罷之

隋書音
樂志上

贈諡呂僧珍詔

天監十年五月

思舊篤終前王令典追榮加等列代通規散騎常侍領軍將軍平
固縣開國侯僧珍器思淹通識宇詳濟竭忠盡禮知無不為與朕
契闊情兼屯泰大業初構茂勳克舉及居禁衛朝夕盡誠方參任
台槐式隆朝寄奄致喪逝傷慟於懷宜加優典以降寵命可贈驃

騎將軍開府儀同三司常侍鼓吹侯如故給東園祕器朝服一具
衣一襲喪事所須隨由備辦諡曰忠敬侯

梁書名
僧珍傳

求言詔 七月丙辰

昔公卿面陳、載在前史、令僕陞奏、列代明文、所以釐彼庶績、成茲
羣務、晉氏陵替、虛誕為風、自此相因、其失彌遠、遂使武帳空勞、無
汲公之奏、丹墀徒闕、闕鄭生之履、三槐八座、應有務之、百官宜有
所論、可入陳啟、庶藉周爰、少匡寡薄

梁書武
帝紀中

停將送老小詔 十一年正月壬辰

夫刑法悼毫、罪不收孥、禮著明文、史彰前事、蓋所以申其哀矜、故
罰有弗及、近代相因、厥網彌峻、髫年華髮、同坐入讐、雖懲惡勸善、
宜窮其制、而老幼流離、良亦可愍、自今逋謫之家、及罪應質作、若

年有老小、可停將送

梁書武帝紀中隋書川
法志通典一百六十四

收贖魏人戰亡者詔

四月戊子

去歲胸山大穢醜類宜爲京觀用旌武功但伐罪弔民皇王盛軌
掩骼埋骸仁者用心其下青州悉使收藏梁書武帝紀中

議南其二郊坎位詔十一年

禮祭月於坎良由月是陰義今五帝天神而更居坎又禮云祭日
於壇祭月於坎並是別祭不關在郊故得各從陰陽而立壇坎兆
於南郊就陽之義居於北郊就陰之義既云就陽義與陰異星月
與祭理不爲坎隋書禮儀志一

收斂道死詔十二年二月丙寅

掩骼埋骸義重周經樽櫝有加事美漢策朕向隅載懷每勤造次
收藏之命亟下哀矜而寓縣遐深遵奉未洽慨然路隅往往而有
言愍沈枯彌勞傷惻可明下遠近各巡境界若委骸不葬或陳衣
莫改卽就收斂量給棺具庶夜哭之魂斯慰霑霜之骨有歸梁書武帝紀

中紀

改建明堂詔 十月丁亥

明堂地勢卑溼未稱乃心外可量就埤起以盡誠敬

梁書武帝紀中又見南史

議盥及滌爵各一匱詔 十二年

祭祀用洗匱中水盥仍又滌爵爵以禮神宜窮精潔而一器之內

雜用洗手外可詳議

隋書禮儀志二

贈諡柳慶遠詔 十四年

念往篤終前王令則式隆寵數列代恆規使持節都督雍梁南北

秦四州郢州之竟陵司州之隨郡諸軍事安北將軍監蠻校尉雍

州刺史雲杜縣開國侯柳慶遠器識淹曠恩懷通雅爰初草昧預

屬經綸遠自升平契闊禁旅重牧西藩方弘治道奄至嶺喪傷慟

於懷宜追榮命以彰茂勳可贈侍中中軍將軍開府儀同三司鼓

吹侯如故諡曰忠惠賻錢二十萬布二百匹

梁書柳慶遠傳

求賢詔

正月辛亥

朕恭祇明祀，昭事上靈，臨竹宮而登泰壇，服裘冕而奉蒼璧，柴望既升，誠敬克展，思所以對越乾元，弘宣德教，而缺於治道，政法多昧，實佇羣才，用康庶績，可班遠近，博採英異，若有確然鄉黨，獨行州閭，肥遯丘園，不求聞達，藏器待時，未加收採，或賢良方正，孝弟力田，並卽騰奏，具以名上，當擢彼周行，試以邦邑，庶百司咸事，兆民無隱，又世輕世重，隨時約法，前以制壘，用代重辟，猶念改悔，其路已壅，並可省除。

梁書武帝紀中

贈諡王茂詔

四月

旌德紀勳，哲王令軌，念終追遠，前典明誥，故使持節散騎常侍驃騎將軍開府儀同三司江州刺史茂，識度淹廣，器宇凝正，爰初草昧，盡誠宣力，綢繆休戚，契隔屯夷，方賴謀猷，永隆朝寄，奄至薨殞，朕用慟於厥心，宜增禮數，式昭盛烈，可贈侍中大尉，加班劍二十

人鼓吹一部諡曰忠烈

梁書王茂傳

加孫謙優秩詔

十四年

光祿大夫孫謙清慎有聞白首不怠高年舊齒宜加優秩可給親

信二十人并給扶

梁書孫謙傳

務本詔

十五年正月己巳

觀時設教王政所先兼而利之實惟務本移風致治咸由此作頃

因革之令隨事必下而張弛之要未臻厥宜民瘼猶繁廉平尚寡

所以竚旒纒而載懷朝玉帛而興歎可申下四方政有不便於民

者所在具條以聞守宰若清潔可稱或侵漁為蠹分別奏上將行

黜陟長吏勸課躬履堤坊勿有不修致妨農事關市之賦或有未

允外時參量優減舊格

梁書武帝紀中

郵民詔

十六年正月辛未

朕當屢思治政道未叶昧且劬勞亟移星紀今太皞御氣勾芒首

節升中就陽禋敬克展務承天休布茲和澤尤貧之家勿收今年
三調其無田業者所在量宜賦給若民有產子卽依格優蠲孤老
鰥寡不能自存咸加賑卹班下四方諸州郡縣時理獄訟勿使冤
滯並若親覽

梁書武帝紀中

量代牲牢詔

四月

夫神無常饗饗於克誠所以西鄰禴祭實受其福宗廟祭祀猶有
牲牢無益至誠有累冥道自今四時烝嘗外可量代

隋書禮儀志二
通典四十九

又詔

十月

今雖無復牲脔猶有脯脩之類卽之幽明義猶未盡可更詳定悉

薦時蔬

隋書禮儀志二
通典四十九

以何遠爲給事黃門侍郎詔

十六年

何遠前在武陵已著廉平復蒞一邦彌盡清白政先治道惠留民

愛雖古之良二千石無以過也宜升內榮以顯外績可給事黃門

侍郎

梁書何遠傳

聽流民還本詔 十七年正月丁巳朔

夫樂所自生含識之常性厚下安宅馭世之通規朕矜此庶氓無
忘待旦亟弘生聚之略每布寬恤之恩而編戶未滋遷徙尙有輕
去故鄉豈其本志資業殆闕自返莫由巢南之心亦何能弭今開
元發歲品物惟新思俾黔黎各安舊所將使郡無曠土邑靡游民
雞犬相聞桑柘交吟凡天下之民有流移他境在天監十七年正
月一日以前開恩半歲悉聽還本蠲課三年其流寓過遠者量加
程日若有不樂還者即使著土籍爲民准舊課輸若流移之後本
鄉無復居宅者村司三老及餘親屬卽爲詣縣占請村內官地官
宅令相容受使戀本者還有所託凡坐爲市埭諸職割盜衰滅應
被封籍者其田宅車牛是民生之具不得悉以沒入皆優量分還

使得自止其商賈富室亦不得頓相兼併遁叛之身罪無輕重並許首出還復民伍若有拘限自還本役並為條格成使知聞

中紀

以蕭景為安右將軍監揚州詔五月

揚州應須緝理宜得其人侍中領軍將軍吳平侯景才任此舉可

以安右將軍監揚州并置佐史侍中如故

梁書蕭景傳

贈諡張惠紹詔十八年

張惠紹志略開濟幹用貞果誠勸義始績聞累任爰居禁旅盡心

朝夕奄至殞喪惻愴於懷宜追寵命以彰勳烈可贈護軍將軍給

鼓吹一部布百匹蠟二百斤諡曰忠

梁書張惠紹傳

旌表甄恬詔天監中

朕虛己欽賢寤寐盈想詔彼羣岳務盡搜揚恬既孝行殊異聲著邦壤敦風厲俗弘益茲多牧守騰聞義同親覽可旌表室閭加以

爵位

梁書孝行甄恬傳州將始興王憺表其行狀

旌沈崇僚詔

前軍沈崇僚少有志行居喪踰禮齋制不終未得大葬自以行乞
淹年哀典多闕方欲以永慕之晨更為再葬之始雖卽情可矜禮
有明斷可便令除釋擢補太子洗馬旌彼門閭敦茲風教

梁書沈崇僚傳

贈丘仲孚詔

豫章內史丘仲孚重試大邦責以後效非直悔吝云亡實亦政績

克舉不幸殞喪良以傷惻可贈給事黃門侍郎

梁書丘仲孚傳

荅蕭昱手詔

昱表如此古者用人必前明試皆須績用既立乃可自退之高昔
漢光武兄子章與二人並有名宗室就欲習吏事不過章為平陰
令興為緱氏宰政事有能方遷郡守非直政績見稱卽是光武猶
于昱之才地豈得比類焉往歲處以淮南郡既不甞行績用為招

遠將軍鎮北長史襄陽太守又以邊外致辭改除招遠將軍永嘉
太守復云內地非願復問晉安臨川隨意所擇亦復不行解巾臨
郡事不爲薄數有致辭意欲何在且且諸兄遞居連率相繼推轂
未嘗缺歲其同產兄景今正居藩鎮朕豈厚於景而薄於景正足
朝序物議次第若斯於其一門差自無愧無論今日不得如此是
兄弟昔在布衣以處成長於何取立豈得任情反道背天違地孰
謂朝廷無有憲章特是未欲致之於理既表解職可聽如啟

梁書蕭景傳

答陶弘景解官詔

卿遣累卻粒尙想清虛山中閑靜得性所樂當善遂嘉志也若有
所須便可以聞仍賜帛十疋燭二十挺又別敕朕月給上茯苓五
斤白蜜二斗以供服餌

道藏本陶隱居集

贈謚馮道根詔

普通元年正月

豫寧縣開國伯新除散騎常侍領左軍將軍馮道根奉上也忠有

功不代撫人畱愛守邊難犯祭遵馮異郭伋李牧不能過也奄致

殞喪惻愴於懷可贈信威將軍左衛將軍給鼓吹一部賻錢十萬

布百匹諡曰威

梁書馮道根傳

給辦永陽太妃喪事詔

十一月己卯

永陽太太妃奄至薨逝哀摧切割不能自勝使出敘哀可給東園

祕器喪事所須隨由口辦祖行有辰式弘茂典

古刻數鈔徐勉撰永陽太妃墓誌銘

諡永陽太妃詔

故永陽太太妃禮數有殊德行惟光訓範蕃嗣式盛母儀卽遠戒

期悲懷抽割可詳典故以隆嘉諡

同上

以江革為太尉臨川王長史詔

前貞威將軍鎮北長史廣陵太守江革才思通贍出內有聞在朝

正色臨危不撓首佐台鉉實允僉諧可太尉臨川王長史

梁書江革傳

收養孤獨詔 二年正月辛巳

春司御氣虔恭報祀陶匏克誠蒼壁禮備思隨乾覆布茲亭育凡
民有單老孤推不能自存主者郡縣咸加收養贍給衣食每令周
足以終其身又於京師置孤獨園孤幼有歸華髮不匱若終年命
厚加料理尤窮之家勿收租賦梁書武帝紀下

徙籍田詔 四月丙辰

夫欽若昊天麻象無違躬執耒耜盡力致敬上協星鳥俯訓民時
平秩東作義不在南前代因襲有乖禮制可於震方簡求沃野且
茲千畝庶允舊章梁書武帝紀下

停賀瑞詔 五月丁巳

王公卿士今拜表賀瑞雖則百辟體國之誠朕懷良有多愧若其
澤滂川泉仁被動植氣調玉燭治致太平爰降嘉祥可無慙德而
政道多缺滄化未凝何以仰叶辰和遠臻冥貺此乃更彰寡薄重

增其九自今可停賀瑞

梁書武帝紀下

下百濟王餘隆詔十一月

行都督百濟諸軍事鎮東大將軍百濟王餘隆守藩海外遠修百職迺誠款到朕有嘉焉宜率舊章授茲榮命可使持節都督百濟

諸軍事鎮東大將軍百濟王

梁書東夷百濟傳

耕籍詔四年二月乙亥

夫耕藉之義大矣哉。桑盛由之而興。禮節因之以著。古者哲王咸用此作。眷言八政。致茲千畝。公卿百辟。恪恭其儀。九推畢禮。馨香靡替。兼以風雲叶律。氣象光華。屬覽休辰。思加獎勸。可班下遠。近廣闢良疇。公私畎畝。務盡地利。若欲附農而耀種。有乏亦加貸卹。每使優徧。孝悌力田。賜爵一級。預耕之司。尅日勞酒。

梁書武帝紀下

贈諡昌義之詔十月

護軍將軍營道縣開國侯昌義之。幹略沈濟。志懷寬隱。誠著運始。

效彰邊服方申爪牙寄以禁旅奄至殞喪惻愴於懷可贈散騎常

侍車騎將軍并鼓吹一部給東園祕器朝服一具縛錢二萬布二

百匹蠟二百斤諡曰烈

梁書昌義之傳

以會稽太守武陵王紀為東揚州刺史詔五年六月

貞白儉素是其清也臨財能讓是其廉也知法不犯是其慎也庶

事無畱是其勤也

南史五十三武陵王紀傳尋授揚州刺史中書詔成武帝加四句

贈諡周捨詔五年

太子詹事豫州大中正捨奄至殞喪惻愴於懷其學思堅明志行

開敏劬勞機要多歷歲年才用未窮彌可嗟慟宜隆追遠以旌善

人可贈侍中護軍將軍鼓吹一部給東園祕器朝服一具衣一襲

喪事隨由資給諡曰簡子

梁書周捨傳

應接元法僧詔六年正月己巳

期謀已定王略方舉侍中領軍將軍西昌侯深藻可使親戎以前

啟行鎮北將軍南兗州刺史豫章王綜董馭雄桀風馳次邁其餘
眾軍計日差遣初中後師善得嚴辦朕當六軍雲動龍舟濟江

武帝紀下

褒異周捨詔六年

故侍中護軍將軍簡子捨義該玄儒博窮文史奉親能孝事君盡
忠歷掌機密清貞自居食不重味身靡兼衣終亡之日內無妻妾
外無田宅兩兒單貧有過古烈往者南司白濁之効恐外議謂朕
有私致此黜免追愧若人一介之善外可量加褒異以旌善人

周捨傳

答徐勉表上五禮詔六年

經禮大備政典載弘今詔有司案以行事也

梁書徐勉傳

又詔

勉表如此因革允釐憲章孔備功成業定於是乎在可以光被八

表施諸百代俾萬世之下知斯文在斯主者其案以遵行勿有失
墜上同

徙臨賀王正德詔六年

汝以猶子情兼常愛故越先汝兄剖符連郡往年在蜀昵近小人
猶謂少年情志未定更於吳郡殺戮無辜劫盜財物雅然無畏及
還京師專為遁逃乃至江乘要道湖頭斷路遂使京邑士女早閉
晏開又奪人妻妾略人子女徐敖非直失其配匹乃橫屍道路王
伯敖列卿之女誘為妾媵我每加掩抑冀汝自新了無後革怨讎
逾甚遂匹馬奔亡志懷反噬遣信慰問冀汝能還果能來歸遂我
夙志謂汝不好文史志在武功今汝杖節董戎前驅豈謂汝狠心
不改包藏禍胎志欲覆敗國計以快汝心今當宥汝以遠無令房
累自隨敕所在給汝稟餼王新婦見理等當停太尉間汝餘房累
悉許同行南史五十一臨賀王正德傳六年為輕車將軍豫章
王北陵王正德亂軍委走為有司所奏下獄帝復詔云

云於是免官例
爵土徒臨海郡

贈諡臨川王宏詔 七年四月

侍中太尉臨川王宏器宇冲貴雅量弘通爰初弱齡行彰素履建
於應務嘉猷載緝自皇業啟基地惟介弟久司神甸歷位台階論
道登朝物無異議朕友于之至家國兼情方弘變贊儀刑列辟天
不憖遺奄焉不永哀痛抽切震慟於厥心宜增峻禮秩式昭懋典
可贈侍中大將軍揚州牧假黃鉞王如故并給羽葆鼓吹一部增
班劍為六十人給溫明祀器敏以褒服諡曰靖惠

梁書臨川
王宏傳

贈諡鄒陽王恢詔 九月

故使持節散騎常侍都督荆湘雍梁益寧南北秦八州諸軍事驃
騎大將軍開府儀同三司荊州刺史鄒陽王恢風度開朗器情凝
質爰在弱歲美譽克宣洎於從政嘉猷載緝方人正論道弘變台
階奄焉薨逝朕用傷慟於厥心宜隆寵命以申朝典可贈侍中司

徒王如故，并給班劍二十人。謚曰忠烈，遣中書舍人劉顯護喪事。

梁書 梁書 梁書

王叔傳

徵庾詵，庾承先詔 普通中

明敫振滯，為政所先。旌賢求士，夢佇斯急。新野庾詵，止足棲退。自

事卻埽，經史文藝多所貫習。穎川庾承先，學道黃老。詵涉釋教，並

不競不營。安茲枯槁，可以鎮躁敦俗。詵可黃門侍郎，承先可中書

侍郎。勒州縣時加敦遣，庶能屈志。方冀鹽梅，梁書 庾

俸祿給見錢，并原失散官物。詔 大通元年正月乙丑

朕思利兆民，惟日不足。氣象環回，每弘優簡。百官俸祿，本有定數。

前代以來，皆多評准。頃者因循，未遑改革。自今已後，可長給見錢。

依時即出，勿令逋緩。凡散失官物，不問多少，並從原宥。惟事涉軍

儲，取公私見物，不在此例。梁書 武

南郊恩詔 正月辛未

奉時昭事，虔薦蒼璧，思承天德，惠此下民。凡因事去土，流移他境者，並聽復宅業，蠲役五年。尤貧之家，勿收三調。孝悌力田，賜爵一級。梁書武帝紀下

賜陳慶之手詔 元年

本非將種，又非豪家，解望風雲，以至於此，可深思奇略，善克令終。開朱門而待賓，揚聲名於竹帛，豈非大丈夫哉。梁書陳慶之傳

謚安成王機詔 二年

王好內怠政，可謚曰煬。梁書安成王秀傳

贈謚裴子野詔 中大通二年

鴻臚卿領步兵校尉，知著作郎，兼中書通事舍人。裴子野，文史足用，廉白自居，劬勞通事，多歷年所，奄致喪逝，惻愴空懷，可贈散騎常侍，賻錢五萬，布五十匹，即日舉哀。謚曰貞子。梁書裴子野傳

立晉安王綱為皇太子詔 三年五月丙申武帝紀作七月乙亥

非至公無以主天下，非博愛無以臨四海。所以堯禪舜讓，惟德是與。文王舍伯邑考而立武王，格于上下，光被四表。今岱宗牢落，天步艱難，清風猶鬱，黎民未乂。自非克明克哲，允武允文，豈能荷神器之重，嗣龍圖之尊？晉安王綱，文義生知，孝敬自然，威惠外宣。德行內敏，羣后歸美，率土宅心，可立綱為皇太子。庶百年勝殘，方流餘慶。舉初學記世後仁，永固洪業。梁書簡文帝紀 藝文類聚十六初學記十多末四句

賜宗戚侯爵詔

七月庚寅

推恩六親，義彰九族。班以侯爵，亦曰惟允。凡是宗戚，有服屬者，並可賜沐食鄉亭侯。各隨遠近，以為差次。其有暱親自依舊章。梁書武帝

下紀

贈諡孔休源詔

四年五月

慎終追遠，歷代通規。喪德疇庸，先王令典。宣惠將軍金紫光祿大夫監揚州孔休源，風業貞正，雅量沖逸，升榮建禮，譽重搢紳。理務

神州化覃歌詠方興仁壽穆是彝倫奄然永逝信用悲惻可贈散
騎常侍金紫光祿大夫贈第一材一具布五十匹錢五萬蠟二百
斤尅日舉哀喪事所須隨便資給諡曰貞子

梁書孔休源傳

諡庾詵詔

四年

旌善表行前王所敦新野庾詵荆山珠玉江陵杞梓靜候南度固
有名德獨貞苦節孤芳素履奄隨運往惻愴於懷宜諡貞節處士
以顯高烈

梁書庾詵傳

贈諡南平王偉詔

五年三月

旌德紀功前王令典慎終追遠列代通規故侍中中書大司馬南
平王偉器宇宏曠鑒識弘簡爰在弱齡清風載穆翼佐草昧勳高
樊沔契闊艱難劬勞任寄及贊務論道弘茲衮職奄焉薨逝朕用
震慟於厥心宜隆寵命式昭茂典可贈侍中太宰王如故給羽葆
鼓吹一部並班劍四十八諡曰元襄

梁書南平王偉傳

以臧盾兼領軍詔

四月

總一六軍非才勿授御史中丞新除散騎常侍盾志懷忠密識用
詳慎當官平允處務勤恪必能緝斯戎政可兼領軍常侍如故

臧盾

傳

詔荅周弘正

中大通中

設卦觀象事遠文高作繫表言辭深理奧東魯絕編之思西伯幽
憂之作事逾三古人更七聖自商瞿稟承子庸傳授篇簡湮沒歲
月遼遠田生表菑川之與梁丘擅瓊邪之學代郡范生山陽王氏
人藏荆山之寶各盡玄言之趣說或去取意有詳略近搢紳之學
咸有稽疑隨荅所問已具別解知與張譏等三百一十二人須釋
乾坤文言及二繫萬機小暇試當討論

陳書周
弘正傳

賜進士出身二品銜廣東等處提刑按察使司按察使兼管驛傳事務直隸王毓藻校刊